



PAulus patria Kytzingensis honestis parentibus natus est anno circiter 1510. Is cum felici ingenio esset præditus, à pueris operam literis dedit, atq; prima rudimēta facile percepit. Inde uerò sese ad Academiam Vuitebergensem contulit, atq; artibus & linguis magna diligentia incubuit. Postea quoq; Luthero & Melanchtone præceptoribus S. Theologiæ operam dedit, atq; Biblica scripta sibi familiarissima reddidit. accedebat etiam uitæ innocentia, morum grauitas, & dicendi peritia, Itaq; factum ut post Ioannis Bugenhagi pastoris Vuitebergensis obitum, hic Paulus omnium uotis ei succederet, atq; Ecclesiæ ibidē præficeretur. Eam functionem ipse magna fidelitate expedit, & ob multas animi uirtutes cūctis gratissimus existit.